

## **Sing vooraf staande: Psalm 84:4 (p. 425)**

- 4 Hul sal van krag tot krag steeds gaan / totdat hul voet in Sion staan:  
geeneen wat daar nie sal verskyn nie. / Let, HEER der leërskaare, let  
op my geroep, hoor my gebed, / en laat my nie in druk verkwyn nie.  
Leen my 'n toegeneë oor; / o Jakobs God, gee my gehoor!

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die  
kragtige werking van God die Heilige Gees.

**Amen.**

## Lofpsalm 119:1 (p. 585)

- 1 Salig wie in hul opregtheid / wandel in die HEER se wet,  
wie Hom soek van ganser harte / en op sy getuig'nis let.  
Salig dié wat in hul wandel / nie op onregspaaie gaan,  
maar wil wandel op die weë / in Gods wet vir hul gebaan.

## Geloofsbelydenis Nicea/Apostolicum

Wet

## Psalm 81:9 (p. 412)

- 9 Neig, my volk, jul oor, / – dis wat Ek getuig het – / neig jul oor en hoor:  
Ag, as Israel / maar op my bevel / voor my woord gebuig het!

Gebed

## Psalm 36:1 (p. 178)

- 1 Die boosheid van die bose man – / my diepste hart getuig daarvan: / “Gods vrees is uit sy oë.”  
Hy vlei homself, in kwaad verstyf, / dat God sy snode wanbedryf / vir altyd sal gedoë.  
Bedrog en onreg is sy woord. / Hy gaan in sy onwysheid voort / en vrees geen bose handel.  
Hy maak by nag sy planne reg, / en kom dan op die sondaarsweg / om in sy kwaad te wandel.

Skriflesing: Nehemia 6

Teks: Nehemia 6:11

**Maar ek het gesê: Sal 'n man soos ek vlug? En hoe durf een soos ek die tempel ingaan en in die lewe bly? Ek sal nie ingaan nie.**  
(Nehemia 6:11 AFR53)

Vrees is een van die satan se magtigste wapens waarmee hy die koninkryk van God probeer verwoes.

- Vrees vir die dood ken ons almal.
- Vrees vir oorlog.
- Vrees vir pyn.

Maar al dreig hierdie dinge ons ook, moet ons onself altyd voor die Here sien staan.

- Ons elkeen ontvang van Hom 'n lewensroeping en Hy beskerm ons sodat ons hierdie roeping kan uitvoer.
- Ons hoef nie elke keer terug te deins vir dreigemente van mense nie.
- Solank as wat ons ons kan verantwoord teenoor die Here, so lank moet ons aangaan, ongeag wat die mense van ons dink of sê.

Nehemia was in hierdie moeilike posisie.

- Hy was 'n hoofskinker by die koning in die land waar hulle in ballingskap is.

- Hier kry hy die boodskap dat die Jode wat saam met Esra teruggekeer het na Jerusalem toe, nog niks gedoen het om die mure van Jerusalem te herbou nie.

Nehemia was so ontsteld hieroor dat die koning gedink het dat hy siek is, en hy vra Nehemia wat aangaan.

- Nadat Nehemia hom vertel het wat pla, kry hy by die koning briewe wat hom magtig om sy werk te gaan doen.
- Hy kry selfs perderuiters en 'n brief aan die koninklike houtverskaffer in Juda om al die hout te gee wat nodig is vir die herstel.

Hierdie taak van Nehemia is 'n heilige taak.

- Hy herstel nie die mure van Jerusalem om sy eie gedagtes te bevredig nie.
- Hy doen dit omdat Jerusalem die stad van sy God is en omdat hierdie stad tot eer van die Here in stand gehou moet word.

Die satan was nog altyd dieselfde, daarom is hy bitterlik ontevrede met hierdie toestand.

- Hierdie volk en hulle stad is in die Ou Testament die simbool van God se kerk.
- Die herstel van die stadsmure van Jerusalem beteken vir die satan dus dat die kerk herstel word!
- As die kerk herstel word, beteken dit geloofsherstel onder die volk.

Daar is nie nog iets wat vir die satan so 'n bedreiging onder die mense is as wanneer hulle geloof verbeter, en hulle diens aan God verbeter nie.

Die satan beskou geloofsgroei as 'n bedreiging vir sy verwoestingswerk.

- Daarom val hy die gelowiges aan, en probeer hy hulle geloof aftakel.
- Onder hierdie mense wat glo, soek die satan weer veral die uit wat die leiding neem in die geloofsake.

Die beste voorbeeld is natuurlik die versoeking van die satan op Jesus Christus.

- Die Here Jesus was die belangrikste van alle mense en daarom was die aanvegtinge teen Hom ook die kwaaieste van alle tye.

Nehemia is hier in 'n soortgelyke posisie as die Here Jesus Christus.

- Hy is ook in hierdie optrede van Hom 'n styltipe van die Here Jesus Christus.
- Daarom wil die satan hom elimineer – Nehemia moet uit die pad uit wegkom.

Die Bybel beskryf die satan se werkmethode, juis vir ons, sodat ons dit kan ken waar ons dit raakloop.

- Die satan bewerk spanning en vrees om jou geloof af te takel.
- Hy doen dit deur spanning in menseverhoudinge te bewerkstellig.
- Hy kry ook by die Here toestemming om ander sake te verongeluk soos byvoorbeeld ons geldsake en siekte.
- Maar sy sterk punt is om deur middel van menseverhoudinge en die dinge wat daaruit voortvloei, te werk.

Nehemia het dadelik vyande.

- Nie geringe mense nie – hulle is mederegeerders wat deur die Persiese regering as goewerneurs aangestel is.
- Hulle is dus baie gevaarlike mense as hulle gaan stories aandra by die koning. En dis presies wat hier aan die gebeur is.

Die duiwel is baie onrustig omdat Nehemia terug is in Jerusalem.

- Hy het dit reggekry dat die vyandige gesindhede van die mense rondom Jerusalem gemaak het dat Esra niks gedoen gekry het nie.
- Nou voorsien die Here 'n ander een om met die werk voort te gaan – iemand met 'n groter verstand en organisasievermoë as Esra.

Daar bly vir die duiwel net een uitweg oor:

- Hy moet Nehemia uit die weg ruim.
- Hy moet hom onskadelik kry.

Sanballat en Gesem stuur toe vir Nehemia 'n boodskap:

- Kom af na die laagte van Ono toe sodat ons kan gesels.
- Hulle wil samesprekings hou.
- Dit klink asof dit politiek is in ons tyd, want die benadering is presies dieselfde.

Maar nou is dit ook so dat daar tye en geleenthede in 'n mens se lewe kom dat jy nie samesprekings hou nie. Daardie tye is wanneer jy voor die almagtige God van hemel en aarde staan met 'n baie uitdruklike opdrag.

- Jy kan nie dan met samesprekings gaan toegee voor mense nie, want ek en jy kan God se eise nie verander nie.
- So sien Nehemia ook die saak.
- Hy staan voor God.
  - Hy is sy verantwoordelikheid aan die Here verskuldig.
  - Hy het vir Sanballat en Gesem niks te sê nie.

Wat laat blyk dat hierdie twee vyande glad nie van plan was om te gesels nie, is dit feit dat die Bybel leer dat hulle Nehemia wou kwaad aandoen.

- Op pad na die plek van samesprekings wou hulle 'n ongelukkie laat plaasvind, waarin Nehemia dan doodgemaak sou word.
- Niemand sou hulle verdink nie, want hulle was dan so vriendelik dat hulle wou samesprekings hou!

Nehemia kan deur hulle kwaad sien, want sy prioriteite is reg. Baie beleefd stel hy sy saak: hy kan nie kom nie, want sy werk is in daardie stadium die belangrikste.

- Die werk in Jerusalem eis sy teenwoordigheid.
- Kom ons stel dit maklik verstaanbaar: Hy laat weet aan hulle dat hy nie kan kom nie, want in daardie stadium wil die Here hom in Jerusalem hê en hy luister liever vir God, want dis vir hom belangrik.

Die satan het egter baie deursettingsvermoë.

- Hy laat weet vier keer dat Nehemia moet kom.
- In hierdie geneul van hom maak hy asof hy bekommerd is oor Nehemia se goeie naam.
- Wat sal die koning van Persië sê as hy moet hoor dat die mense sê jy is besig om teen hom in opstand te kom?

Die waarheid is dat Sanballat self hierdie storie begin het. Dis nie ander mense wat so gesê het nie (2:19).

Dan is daar nog die medewerkers van die satan binne-in die kerk ook.

- Die valse profete kom na Nehemia toe.

- Hier waar hy dit seker die minste verwag.

Die aanval kom ook aanloklik. Semaja vertel vir Nehemia hoe onmisbaar hy op hierdie stadium is, want sonder hom kan die muurbouery nie aangaan nie.

- Nehemia moet egter in gedagte hou dat daar in die nag sluipmoordenaars kan kom wat hom om die lewe kan bring.
- Hy stel voor dat hulle twee in die nag in die tempel gaan wegkruip.

Moet iemand wat in die openbaar gestuur is deur die Here nou in die geheim gaan wegkruip? Hoe werk dit? Sal 'n man soos ek vlug? En hoe durf een soos ek by die tempel ingaan en bly lewe?

Daarmee bely Nehemia dat daar sekere grense in die lewe is wat 'n mens net nie oorskry nie.

- Hy behoort net so min in die tempel as in die laagte van Ono.
- Hy sien toe dadelik dat as hy saamgaan in die tempel, daar 'n klag teen hom gelê gaan word dat hy oortree het in die tempel.
- Daar was net een straf – die doodstraf. Daar was ook geen ander uitweg nie!

So werk die satan.

- As hy jou eers bang het, dan wil hy hê dat jy dinge moet doen waarmee jy sondeskuld op jou laai.
- Hy laat jou van jouself 'n oortreder maak as jy nie oppas nie!

Iemand soos ek moet die muur bou.

- Iemand soos ek moet openlik werk en getuig. Met *iemand soos ek* word hier bedoel: Almal van ons!
- Ons moet nie in die kerk wegkruip as God van ons verwag om op te tree nie.
- Ons mag ook nie swyg oor ons geloof wanneer die Here wil hê dat ons moet praat nie.

Die Here roep ons juis tot sterk optrede.

- 'n Mens gee ook nooit aan verkeerde dinge toe of bespreek dit om 'n ooreenkoms iewers tussen reg en verkeerd te bereik nie.
- Voor God stel jy net SY saak voorop.

Die Voorbeeld hiervan is Jesus Christus.

- Hy kompromitteer nooit die sonde met geregtigheid nie.
- Dis dan ook juis waarom Hy vermoor word.

Hy staan so sterk vir die saak van God dat die mense Hom haat.

- Ook nie almal nie, net die wat die waarheid nie baie liefhet nie.
- Vir sy regverdigheid kruisig hulle Hom sodat Hy sterf.

Maar daar het baie meer gebeur as wat ons met die oë gesien het.

- Hy het ook altyd geweier om aan die satan toe te gee, want die satan wou Hom altyd iets laat oorkom het sodat Hy nie die verlossingswerk volbring waarvoor God Hom gestuur het nie.
- Daarom bied die satan vir Christus die koningskap oor die hele wêreld aan, as Jesus hom aanbid. Hy wil dat Jesus van die tempel se dak afspring.

Maar Jesus wyk nooit.

- Die arm mense het Hy lief.
- Hy probeer om sondiges te help wat beter wil doen.

Maar met die sonde self het die Here Jesus Hom nooit versoen nie.

- Iemand soos Hy het nie in die tempel gaan wegkruip vir sluipmoordenaars nie.
- Iemand soos Hy vleg liever 'n sweep en slaan al die sondemakers uit die tempel uit.
- Iemand soos Hy sterf liever vir die waarheid.
  - Hy sterf ook sodat mense soos ons kan doen wat God van ons vra,
  - want Hy versterk ons met die krag en die teenwoordigheid van God die Heilige Gees!

Geliefdes, laat ons dan ons geloof uitleef, en vasstaan vir die waarheid soos mense wat nie wegkruip vir die satan en sy aanvallers nie.

Laat ons lewe soos mense wat geensins wyk voor die verkeerde nie – soos mense wat die kwaad oorwin.

**Amen.**

Slotgebed

Slotpsalm 119:11 (p. )

- 11 HEER, leer my u wet dat ek dit / tot die einde toe kan hou;  
gee verstand en gee volharding, / dan bly ek daaraan getrou.  
Laat my leef na u bevele – / niks wat my so kan behaag.  
Neig my hart daartoe, maar nimmer / om na woekerwins te jaag.

Die HERE sal jou seën en jou behoed;

Die HERE sal sy aangesig oor jou laat skyn en jou genadig wees;

Die HERE sal sy aangesig oor jou verhef en aan jou vrede gee.

**Amen.**

Dr MJ du Plessis  
Hulpdienspredikant  
Gereformeerde Kerk Clanwilliam  
Datum: 2 November 2014